



JUDICIAL SYSTEM MONITORING PROGRAMME  
PROGRAMA MONITORIZASAUN SISTEMA JUDISIAL

***Komunikadu Imprensa***

***Periodu : Fevereiru 2012***  
***Edisaun : 07 Marsu 2012***

**Tribunál Distritál Baucau aplika artigu 125 KPP, ba testemuña ne'ebé mak loloos tenke fó depoimentu**

Iha loron 27/02/2012, Tribunál Distritál Baucau hala'ó audiénsia julgamentu hodi rona depoimentu husi testemuña ba kazu maus tratus ba kónjuje ne'ebé mak komete husi arguidu ho inisial JMX hasoru nia kaben PX iha Suco Letemumu, Sub Distritu Quelicai, Distritu, Baucau. Kazu ne'e rejistadu iha tribunál ho número prosesu 72/CRM.C/2011/TDB.

Prosesu julgamentu ba kazu ne'e prejide ho kompozisaun juiz kolektivu ne'ebé lidera husi Dra. Angela Faria Belo hanesan juiza presidente no akompañadu husi Dr. Afonso Carmona no Dr. José Goncalves. Husi parte Ministériu Públiku, representa husi Dr. Aderito Tilman no arguidu hetan defeza husi Dr. Marçal Ximenes Guterres no Dra. Casilda Sebastiana Ximenes husi LBH ECM Baucau.

Diretór JSMP Luis de Oliveira Sampaio haktuir katak "*mesmu nafatin apresia ba serbisu autór judisiáriu ne'ebé mak ho esforsu, nafatin realiza prosesu justisa ba kazu krime sira, liu-liu ba, kazu ho natureza krime violénsia doméstika, maibé JSMP preokupa oituan ho aplikasaun artigu 125 KPP ba testemuña, tanbá bele implika ba produsaun provas*".

Mesmu nafatin respeita pontu-de-vista interpretasaun juiz konabá provizasaun sira iha lei prosesual liu-liu ba artigu 125 Kódigu Prosesu Penál (KPP), maibé tuir JSMP nia intendementu katak artigu 125 KPP proibe/limita direitu atu rekuza hodi fornese depoimentu ka sasin ba ema sira ne'ebé tama iha kategoria hanesan arguidu nia axendente, dexendente, maun ka alin afin to segundu grau, adotante, adotadu ka arguidu nia kónjuje, no ema ne'ebé mak moris hela ho nia ka uluk moris hamutuk hanesan fen ho laen.

Entertantu iha kazu ida ne'e testemuña LDS ne'ebé mak nu'udar arguidu nia rian (arguidu nia feton nia laen), la tama iha kategoria ne'ebé mak defini iha artigu 125 KPP. Tanbá ne'e tuir JSMP nian hanoin, testemuña refere iha obrigasaun bázeia ba artigu 122 & 123 KPP hodi fó depoimentu ba tribunál.

Tuir kronolojia kazu ne'ebé mak haktuir husi Juiz no bázeia ba akuzasaun husi Ministériu Públiku katak iha loron 02/03/2011, iha Suco Letemumu, Sub Distritu Quelicai, Distritu, Baucau, arguidu ho lezada diskuti malu tanbá arguidu husu lezada atu ba hola tua mutin, maibé lezada rejeita tanbá sei lori hela sira nia oan ba eskola. Tanbá ne'e arguidu lori besi kanu ida baku iha lezada nia kotuk laran dala tolu no iha lezada nia kanotak to'o monu ba rai. Tuir akuzasaun haktuir mós katak, tanbá asaun ne'e, lezada halai ba subar tiha iha uma kotuk, maibé wainhira nia fila fali mai, arguidu ho besi kanu, kontinua baku iha lezada nia liman fuan no rezulta tohar.

Hahalok arguidu nian rezulta lezada nia isin bubu no nia liman fuan ida tohar no hetan tratamentu iha hospital durante fulan ha'at.

Refere ba hahalok arguidu nian, iha Ministériu Públiku nia alegasaun finál, akuza arguidu ho artigu 154 Kódigu Penál konabá maus tratus ba kónjuje, no husu ba tribunál atu aplika pena prizaun tinan 3 maibé bele suspende.

Iha parte seluk, husi parte defeza aseita ho pena suspensaun ne'ebé mak Ministériu Públiku propoin.

Audénsia julgamentu ba leitura akordaun, tuir data ne'ebé mak determina husi tribunál, sei hala'o iha loron 15/03/2012 iha oras 15.00 lorokraik.

Atu hetan informasaun kle'an, favor kontaktu:

Luis de Oliveira Sampaio  
Diretór Ezekutivu JSMP  
E-mail: [luis@jsmp.minihub.org](mailto:luis@jsmp.minihub.org)  
Landline: 3323883/7295795